

## Shaitaan Kī Chaalbaazī

**Taurait : K̄hilqat 3:1-13**

Allaah taa'alā ke banaae hue jaanwaroñ me se, saam̄p sabse zyaadā dhokhebaaz thā. Saam̄p ne aurat se baat karī aur puchā, "Aurat, kyā tumko sach me Allaah taa'alā ne baaḡ ke kisī bhī peḍ kā phal khaane se manā kiyā hai?"<sup>(1)</sup> Aurat ne saam̄p ko jawaab diyā, "Naheen, ham baaḡ ke saare peḍoñ se phal khā sakte haiñ,<sup>(2)</sup> lekin baaḡ me ek peḍ hai jiskā phal hameñ khaane ke liye manā kiyā hai aur kahā hai ki hameñ us peḍ ko chunā bhī naheen hai, warnā ham sach me mar jaaenge."<sup>(3)</sup> Saam̄p ne aurat se kahā, "Tum yaqeenan naheen maroge."<sup>(4)</sup> Allaah taa'alā jaantā hai ki agar tum us peḍ kā phal khā loge to us din tumhaarī āñkheñ khul jaaenge aur tum Allaah taa'alā kī tarah ho jaaoge, jo acche, bure, barkat, aur azaab kā farq jaantā hai."<sup>(5)</sup>

Aurat ne dekhā ki wo peḍ bahut k̄hubsurat thā, aur uskā phal bhī dikhne me acchā lag rahā thā. Usko yaqeen ho gayā ki peḍ kā phal usko aqlmañd banā degā, to usne peḍ se phal toḍ kar khaayā aur apne shauhar ko bhī diyā, jo is ke saath thā. Usne bhī khā liyā.<sup>(6)</sup> Tab donoñ kī āñkheñ khul gayeen aur unkā cheezoñ ko dekhne kā nazriyā badal gayā. Unhone dekhā ki unke jism par kapḍe naheen haiñ. To unhone añjeer ke pattoñ ko sī kar kapḍoñ kī tarah pahan liyā.<sup>(7)</sup>

Shaam ke waqt unheñ Allaah taa'alā kī maujudgī kā ehasaas huā to wo baaḡ ke peḍoñ ke peechhe chup gae.<sup>(8)</sup> Allaah taa'alā ne Ādam<sup>(a.s)</sup> ko pukaarā aur kahā, "Tum kahaar ho?"<sup>(9)</sup> Ādam<sup>(a.s)</sup> ne jawaab diyā, "Main āpkī maujudgī ke ehasaas se ḍar gayā huñ kyūñki main binā kapḍoñ ke huñ, islie k̄hud ko peḍoñ me chupā liyā hai."<sup>(10)</sup> Allaah taa'alā ne puchā, "Tumko kisne bataayā ki tum kapḍe naheen pahne ho? Kyā tumne us peḍ kā phal khaayā hai jisko maine tumhaare liye haraam kiyā thā?" Tab<sup>(11)</sup> Ādam<sup>(a.s)</sup> ne kahā, "Jis aurat ko āp ne mere saath rakhā hai, usī ne mujhe us peḍ kā phal diyā thā islie maine khā liyā."<sup>(12)</sup> Phir Allaah taa'alā ne aurat se puchā, "Ye tune kyā kiyā?" Tab aurat ne kahā, "Maine saam̄p kī baatoñ me ā kar phal khā liyā."<sup>(13)</sup>